

**REGIONAL NEWS UNIT  
ALL INDIA RADIO, AGARTALA  
Date: 03-04-2024  
Time: 07.35-07.40 AM Hrs  
BENGALI MORNING BULLETIN**

---

**Campaigning is picking up:**

লোকসভা নির্বাচনের প্রথম দফার ভোটের তারিখ ঘনিয়ে আসার সাথে সাথে প্রচারে গতি বাড়ছে। প্রধান রাজনৈতিক দলগুলির বরিষ্ঠ নেতারা সক্রিয়ভাবে যেসব রাজ্যে এই পর্যায়ে ভোট হবে সেখানে প্রচার চালাচ্ছেন। প্রধান মন্ত্রী ও প্রবীণ বিজেপি নেতা নরেন্দ্র মোদি গতকাল রাজস্থানে কোটপুটলির কাছে প্রথম নির্বাচনী জনসভায় ভাষণ দেন। তিনি বলেন বিজেপি এই রাজ্য থেকে 2014 এবং 2019-এ 25 টি আসন জিতেছিল এবং এবারও তাই হতে চলেছে। শ্রী মোদি আরও বলেন এটি সাধারণ নির্বাচন নয়, বরং উন্নত ভারত ও উন্নত রাজস্থানের নির্বাচন।

কংগ্রেস এবং ইন্ডিয়া জোটের সমালোচনা করে তিনি বলেন বিরোধী দলগুলি দেশের জন্য নয়, পরিবারের জন্য নির্বাচনে লড়ছে। অন্যদিকে, কংগ্রেসের রাজ্য সভাপতি গোবিন্দ সিং দোতাসারা, প্রাক্তন মুখ্যমন্ত্রী অশোক গেহলট এবং দলের বরিষ্ঠ নেতারা পালি এবং যোধপুরে দলীয় প্রার্থীদের মনোনয়ন সমাবেশে বক্তব্য রাখেন।

\*\*\*\*\*

**Defence minister lauded efforts of Army:**

নয়াদিল্লিতে গতকাল প্রতিক্ষামন্ত্রী রাজনাথ সিং কমান্ডারদের সম্মেলনে ভাষণ দিতে গিয়ে, পশ্চিম সীমান্তে সেনাবাহিনী এবং নিরাপত্তা বাহিনীর প্রচেষ্টার প্রশংসা করেন। তিনি দেশের সীমান্ত রক্ষায় এবং সন্ত্রাসবাদের বিরুদ্ধে লড়াইয়ে এবং প্রয়োজনের সময় অসামরিক প্রশাসনকে সহায়তা প্রদানে সেনাবাহিনীর দুর্দান্ত ভূমিকার কথা তুলে ধরেন। তিনি বলেন, জম্মু ও

কাশ্মীরের কেন্দ্রশাসিত অঞ্চলে সমন্বিত কার্যক্রম এই অঞ্চলে স্থিতিশীলতা বৃদ্ধিতে অবদান রাখছে এবং এটি অব্যাহত রাখা উচিত।

\*\*\*\*\*

#### **SVEEP-CEO TRIPURA :**

রাজ্যের মুখ্য নির্বাচনী আধিকারিক পুনিত আগরওয়াল বলেছেন, নির্বাচনী প্রক্রিয়ায় তরুণদের গুরুত্বপূর্ণ ভূমিকা রয়েছে। যুব সমাজকে ভোট দেওয়ার আবেদন জানিয়ে মুখ্য নির্বাচনী আধিকারিক বলেন, তরুণ ভোটারদের উচিত তাদের পছন্দের যোগ্য প্রার্থীকে ভোট দেওয়া। গতকাল ত্রিপুরা বিশ্ববিদ্যালয়ে আয়োজিত সিস্টেমটিক ভোটার এডুকেশন অ্যান্ড ইলেক্টোরাল পার্টিসিপেশন অনুষ্ঠানে বক্তব্য রাখতে গিয়ে মুখ্য নির্বাচনী আধিকারিক পুনিত আগরওয়াল একথা বলেন।

তিনি ভোটারদের রাজনৈতিক দলগুলির যে কোনও প্ররোচনার শিকার হওয়া থেকে বিরত থাকার আহ্বান জানান।

মুখ্য নির্বাচনী আধিকারিক, তরুণ ভোটারদের নির্বাচনের সময় কোনও ভুল কাজ চোখে পড়লে সি-ভিজিল অ্যাপে অভিযোগ জানাতে বলেছেন। তিনি বলেন, সি-ভিজিলে অভিযোগ দায়ের করার সঙ্গে সঙ্গে ফ্লাইং স্কোয়াডের দল ঘটনাস্থলে পৌঁছাবে, অভিযোগটি পরীক্ষা করে দেখবে এবং দ্রুত ব্যবস্থা নেবে।

\*\*\*\*\*

#### **Heroin Seized:**

উনকোটি জেলার কুমারঘাট থানাধীন ভাটি দুধপুর এলাকায় গত সোমবার সন্ধ্যারাতে গোপন সংবাদের ভিত্তিতে অভিযান চালিয়ে পুলিশ 36 দশমিক দুই তিন গ্রাম হেরোইন বাজেয়াপ্ত করেছে।

অভিযানে ছিলেন, কুমারঘাটের S.D.P.O কমল দেববর্মা, থানার O/C শঙ্কর সাহা, পুলিশ ইন্সপেক্টর আর. হলাম প্রমুখ।

\*\*\*\*\*

**Nomination-East Tripura :**

পূর্ব ত্রিপুরা লোকসভা আসনে ইন্ডিয়া জোট সমর্থিত সিপিআইএম প্রার্থী রাজেন্দ্র রিয়াং গতকাল ধলাইর জেলাশাসক সাজু ওহায়িদের কাছে মনোনয়ন পত্র জমা দেন। মনোনয়নপত্র জমা দেবার আগে সিপিআইএম ধলাই জেলা কমিটির উদ্যোগে একটি মিছিল জেলা শাসকের অফিস পর্যন্ত যায় পরে ধলাই জেলা সিপিআইএম জেলা সম্পাদক পঙ্কজ চক্রবর্তীর নেতৃত্বে প্রার্থী সহ পাঁচ জনের প্রতিনিধি দল জেলাশাসকের অফিসে যান এবং প্রার্থী রাজেন্দ্র রিয়াং জেলাশাসকের হাতে মনোনয়নপত্র তুলে দেন।

\*\*\*\*\*

**Congress released names 17 candidates:**

কংগ্রেস আসন্ন লোকসভা নির্বাচনের জন্য ১৭ প্রার্থীর আরেকটি তালিকা প্রকাশ করেছে। এতে উড়িষ্যার আট, অন্ধ্রপ্রদেশের পাঁচ, বিহারের তিন এবং পশ্চিমবঙ্গের একটি আসনের জন্য প্রার্থীর নাম ঘোষণা করা হয়েছে।

এর সাথেই কংগ্রেস অন্ধ্রপ্রদেশের আসন্ন বিধানসভা নির্বাচনের জন্য ১১৪ টি আসনে প্রার্থীদের নাম এবং উড়িষ্যা বিধানসভা নির্বাচনের জন্য ৪৯ জন প্রার্থীর নামের তালিকা প্রকাশ করেছে।

\*\*\*\*\*

**B L Santosh :**

আগরতলায় বিজেপি নির্বাচনী কার্যালয়ে গতকাল এক সাংগঠনিক বৈঠক অনুষ্ঠিত হয়। এই বৈঠকে লোকসভা নির্বাচনে দলের প্রস্তুতি নিয়ে বিস্তারিত আলোচনা হয়। উপস্থিত ছিলেন মুখ্যমন্ত্রী অধ্যাপক ডাঃ মানিক সাহা, কৃষিমন্ত্রী রতন লাল নাথ, অর্থমন্ত্রী প্রণজিৎ সিংহ রায়, বিজেপি'র সর্বভারতীয় সাংগঠনিক সাধারণ সম্পাদক বি এল সন্তোষ, প্রদেশ বিজেপি সভাপতি রাজীব ভট্টাচার্য ও পশ্চিম ত্রিপুরা লোকসভা আসনের বিজেপি প্রার্থী সাংসদ বিপ্লব কুমার দেব।

\*\*\*\*\*

## **Bodies of ten Maoists recoverd in Chhattisgarh:**

ছত্তিশগড়ে বিজাপুর জেলার গাঙ্গালুর এলাকায় গতকাল নিরাপত্তা বাহিনী ও মাওবাদীদের মধ্যে গুলি বিনিময় হয়। সিআরপিএফ, কোবরা ব্যাটালিয়ন, জেলা রিজার্ভ গার্ড এবং বিশেষ টাস্ক ফোর্সের একটি যৌথ দল এই এলাকায় মাওবাদীদের উপস্থিতি সম্পর্কে গোয়েন্দা তথ্যের ভিত্তিতে অনুসন্ধান অভিযান চালায়। মাওবাদীরা লেন্দ্রার জঙ্গলে নিরাপত্তা কর্মীদের অতর্কিত হামলা চালায়। নিরাপত্তা বাহিনী পাল্টা জবাব দেয়।

গুলি বিনিময়ের পর নিরাপত্তা কর্মীরা দশজন মাওবাদীর মৃতদেহ উদ্ধার করেছে। এছাড়াও ঘটনাস্থল থেকে একটি লাইট মেশিনগান-এলএমজি, একটি ব্যারেল গ্রেনেড লঞ্চার-বিজিএল এবং অন্যান্য অস্ত্র ও গোলাবারুদ উদ্ধার করা হয়েছে।

\*\*\*\*\*

## **Genaral Observer-Belonia :**

পশ্চিম ত্রিপুরা লোকসভা আসনে কেন্দ্রের সাধারণ পর্যবেক্ষক ভূপেশ চৌধুরী গতকাল বিলোনিয়া সফর করেন। সফরকালে তিনি দক্ষিণ জেলায় পশ্চিম ত্রিপুরা লোকসভা আসনের নির্বাচনের প্রস্তুতি খতিয়ে দেখেন। বিলোনিয়া সার্কিট হাউসে পর্যবেক্ষক ভূপেশ চৌধুরী বিভিন্ন রাজনৈতিক দলগুলির প্রতিনিধিদের উপস্থিতিতে সর্বদলীয় সভায় অংশ নেন। এই বৈঠকে সাধারণ পর্যবেক্ষক শ্রী চৌধুরী নির্বাচন শান্তিপূর্ণভাবে সম্পন্ন করতে সব রাজনৈতিক দলের সহযোগিতা কামনা করেন। তিনি নির্বাচনী পর্যবেক্ষক নির্বাচনী আচরনবিধি ভঙ্গের কোন অভিযোগ থাকলে তা সি-ভিজিল অ্যাপে আপলোড করার পরামর্শ দেন।

\*\*\*\*\*

## **Weather:**

আজ দুপুর পর্যন্ত আবহাওয়ার পূর্বাভাসে জানানো হয়েছে আকাশ অংশত মেঘলা থাকবে। বজ্র বিদ্যুৎ সহ হালকা থেকে মাঝারি ধরনের বৃষ্টিপাত হতে পারে। রাজ্যের সব জেলায় বিক্ষিপ্তভাবে বজ্র বিদ্যুৎ সহ ঘন্টায় ৩০

থেকে ৪০ কিলোমিটার বেগে ঝড়ো হওয়া সহ ভারী বৃষ্টিপাতের সম্ভাবনা রয়েছে।

আগরতলায় আজ সকালে সর্বনিম্ন তাপমাত্রা ছিল ২৫ ডিগ্রি সেলসিয়াস। দিনের সর্বোচ্চ তাপমাত্রা থাকবে ৩৫ ডিগ্রির কাছাকাছি।

\*\*\*\*\*

\*\*\*\*\*